

Kibeyne Inetit






Pahavwi ahj kewye Gabriyew awahkiska gavit Uhokri ta avitit paha paytwempu kewye Nazaré ku pariye avit waxri Galileyamnaw. Ig awahkiska gumin pahavu himano guw Mahi ku pariye kuwis ahegbet gunetni gikak pahavwi awayg. Ig awayg giw José. Ig amekene Davi gihiwhi.

Ig ahj danuh atere ta guvinekut Mahi. Ig awna gut: "Ba pi ay? Kiyavwiye Uhokri kabayhap. Ig ay pikak." Eg timapni hene, eg wakaymni. Eg awna: "Mmahki ner awna nutuh inakni hene?" Igme ahj awna gut: "Ka muwaka avis, kiyavuno Mahi. Pis kabunuga gikak Kiyavwiye Uhokri. Pis biwhkisnek. Pis sarayhnek pikamkayh awayg. Pis sarayh giw Jesus. Ig humawnek kiyatye hiyeg. Ig kanumkanek Kiyavwiye Uhokri inurikyene gikamkayh. Kiyavwiye Uhokri keh ig kumaduka hiyeg hawata ke gihawkribe amekene Davi. Ig kumadukanek amekene Jakó gihiwhivwi akiwka akiwkanek. Gikumadukan yuma amaksemninek." (Luwkas 1.26-33) Eg kiyavuno Mahi timapni hene, eg awna git: "Nop nah ay. Nah Uhokri gibuk. Hiyawa ig keh ku samah piwn ta nuvitit." Ig ahj timapni hene, ig tivik.

(Luwkas 1.38)



Ig José tivik adahan ig tamakiswiye giw. Ig tivik avititak paytwempu Nazaré ku pariye ayge Galileynamaw. Ig tivik ta avitit Judeynamaw, ta avitit paha paytwempu kewye Belém, ku kiney amekene Davi ig wayvuka. Ig atak atere mmanawa ig amekene Davi gihewi. Ig atak tamakiswiye giw gukak kiyavuno Mahi ku kakak ig kuwis ahegbet ginetni. Egme biwhkisno giwntak Uhokri Gitip. Egkis danuh atere, eg kiyavuno Mahi gukaygavrik danuh adahan eg pamakutekwiyo. Heneme yuma iwetrit ayge gudahan ariku payt danuhpenevwi givinkis. Ayteke nikwe egkis ute paha payt pak avin. Ayge eg sarayhe gukamkayh guhimnatine. Nikwe eg awasamkuhpig akak giybet, eg haritasevgi amadgat pak amanarati.

(Luwkas 2.4-7)



Aygenewa avit ini waxri pahabu muwtohvutne ayge amatmadga.

Igkis ayge avuriwnes givikis muwtoh hewke tiyegem. Pahaye adahan pahavwi ahj Uhokri giwatni hiyapkiswe ta gitkis.


Uhokri gibutni uguhpigkis. Igkis hiyapni hene, igkis avisasew ka aynsima.

Igme ahj awna gitkis: "Ka yi muwaka avis. Timapnabay nuwnuh. Nah ewkne yit kibeyne inetit. Ka aynsima batekka ay gidahankis madikte hiyeg. Mmanawa avimnewa inin yamnihten amadgat wayk kuwis. Ig wayvuka avit ini paytwempu ku kiney amekene Davi wayvuka. Igi Ukivarawiy Cristo, ig Uhokri gikanyan adahan yikumaduketni. Nah akkite yit ku samah yis hiyakgi. Yis utivginek awasamuk akak giybet ig harit amadga pak amanarati." Pisenwa ner ahj giwn, pahaye adahan ka aynsima ahj inurikyenevwi hiyapkiswe ayge gihumwa. Igkis kibeyhenes Uhokri. Igkis awna: "Kibeyne gidahan Uhokri ay inurik. Batekka ay gidahankis hiyeg ku pariye Uhokri gibetkivu ay amadga hawkri."

(Luwkas 2.8-14)



Ayteké ariwnteke ini ig bakimni aymuhwe. Ig kawih Uhokri
gihiyekemni kabayntiwa. Ig humaw hiyakemniye hiyeg. Igme
Kiyavwiye Uhokri ka gibetkisima gikak. (Luwkas 2.40)



Ayteke ariwnteke ini kibite kamukri akiw, pahavwi awayg kewye Joawh Batista ig danuh atere amadgat amatap. Ig awna ta gitkis hiyeg: "Wagesnabay yihiyekemni. Kewvinabay atan ahakwat un adahan ekkene ku yis amevene ini ku Kiyavwiye Uhokri bayahminay ariw yitaraksan." Ayge nikwe ka aynsima hiyeg danuh atere gimkanit Joawh Batista adahan igkis ihpene inakni giwn. Igkis danuh ariwntak madikte waxri Judeyamnaw. Igkis danuh avititak paytwempu Jerusalém. Igkis danuh atere, igkis ekkeviye gitaraksankis git Joawh Batista. Igme kaywevgikis avigku egu warik Jordawh adahan igkis amevene ini ku Kiyavwiye Uhokri bayahminigkis ariw gitaraksankis.

Ig Joawh Batista madiptivye. Ig kasimsavu akak kamelu asivgi. Ig kakabutikvu akak pak amar. Gimaname tanan akak ahayak anunu. Ig awna gitkis hiyeg. Giwn: "Pahavwi nehmnikuhpiye nuhavuh butte ku pariye ka aynsima gikiytani mpiyan. Nah yuma nukiyanisima gitivut adahan nah paberetusaw gitivut adahan nah ayavig wiwh gikaswatni gikugkaptak. Ku aysaw nah kaywevyi nah kawikhis un ta yivitit. Igme kaywevyinek gikak igyewa Kiyavwiye Uhokri Gitip adahan ig kawikhis gidahanwa gihiyekemni akak gannu ta yivitit."

Abetnewa ini hawkri ig Kiyavwiye Jesus pes avititak paytwempu Nazaré, ayte avit Galileyamnaw. Ig danuh atere git Joawh Batista. Igme Joawh Batista kaywevgi avigku egu warik Jordawh. Igme Kiyavwiye Jesus iyak ahakwatak un, aynewa ig hiyap en woke. Ig hiyap Kiyavwiye Uhokri Gitip muhuke ta givitit, gihivak ke pahavu tukwabe. Ayteke pahat ikuvimnat awna aytontak inuriktak. In awna: "Pisnewa nukamkayh nubetki. Nah batek pikak ka aynsima." (Markus 1.4-11)




Ayteke ariwnteke ini ig Kiyavwiye Jesus wagehe ta avitit paha waxri imuwdnene. Ayge ig pahadguhe neras ku pariye ig muwaka. Igkisme danuh atere git. Ayge nikwe ig kaniybete gaytakis madikawku gikebikis gikakkis piyana gawnakis (12) adahan igkis wewnes gikak. Hawata adahan igkis awahkiska adahan igkis ekkenes ginetni muwapuw. Avim ini ig ike gannukis givititkis adahan igkisme piyihpiyes hiyeg ariw gikahrikis, hawata adahan igkis pekkiswiyes wavye givititkis hiyeg.

(Markus 3.13-15)



Pahavwi awayg farisew ayge. Giw Nikodemus. Ig pahavwi gaytakis hiyeg judeyenevwi giwewkistenkis. Pahay hawkri tiyegem ig tivik danuhpene git Kiyawwiye Jesus. Ig danuh atere, ig awna git: "Kiyawwiye, usuh hiyakni ku Kiyawwiye Uhokri awahkispi adahan ukannuhten. Yuma pahavwinema awayg hiya akehka akebi ini annut ku pariye pis keh. Wake pis ka gikakma Kiyawwiye Uhokri, pis ka hiyakam nukehka." Igme Kiyawwiye Jesus kaytwa giwn: "Ku pahavwi ka wayvuka nukunewa akiw, ig ka hiya igma kawih Uhokri gikumadukan. Ihanaba inakni nuwnuh. Henewatbaki in." Igme Nikodemus kaytwa giwn: "Mmahpaki ig pahavwi wayvuka akiw, ig ku kiyawvip? Ig ka hiya igma diyuh gutunrikut ginag akiw adahan eg sarayhgi amadgat wayk akiw." Igme Kiyawwiye Jesus awna git: "Amawka ku madikte hiyeg gitipkis wayvuka giwntak Uhokri Gitip. Gitip kewa un dehetnikibe ku pariye keh igkis aymuhwa. Ku samah bakimni wayvuka amadga inin abetimpi giwnra hawata utip in wayvuka abetimpi ini un giwntak Kiyawwiye Uhokri. Ihanaba inakni nuwnuh. Henewatbaki in. Ku pariye wayvuka ariwntak amadgaya inin in amadgayawa inin. Inme utip in wayvuka akiw giwntak Uhokri Gitip." (Joawh 3.1-6)



Ariwnteke ini ig
Kiyavwiye Jesus tivik avitite
paha paytwempu kewye Nayh
gikakkis gikannuhnivwi. Ka aynsima
hiyeg akiw tivikwiye gihaptikis. Igkis
danuh atere kenessa anumekut ini
paytwempu alapota, ig sarayh givegi, ig hiyap
pahabu hiyeg. Igkis avuhekwiyevwi. Igkis avuhpiye pahavwi awayg miyaviye.
Ig pahavu madankuno gukamkayh, ig pahavwiwatnen. Ka aynsima hiyeg
paytwempuyenevwi ayge gukak. Eg tihano ka aynsima. Ig Kiyavwiye Jesus
hiyapni hene, ig ka aynsima kayah gudahan. Ig awna gut: "Ka muwaka tih."

Aytekig danukwa kenessa arimkat ner awayg gitiy, ig dax ini gitiy. Igkisme ku
pariye gihiyetniwvi igkis misekwe. Aytekig Kiyavwiye Jesus awna: "Awayg, nah
awna pit. Kannikaw!" Aynewa ig awayg kannikew, ig kavusa awna. Aytekig
Kiyavwiye Jesus ekkevgi ta gut ginag. Madikte hiyeg hiyapni hene, igkis
avisasew. Igkis kibeyhenes Uhokri. Igkis awna: "Kibeyne. Pahavwi Uhokri
gawneve kuwis kahayak ubetwiyi. Kuri Uhokri parak abet uhawkanwiw wixwiy
gihiyegavu!"

(Luwkas 7.11-16)



Ku samah ig Kiyavwiye Jesus betnene ayge avit paha waxri imuwdnene, ig sarayh givegi warikwit. Ig hiyap pahabunene hiyeg kuruw gimkanit. Ig hiyapni hene, ig awna git Filip: "Kit wixwiy isim im adahan gaxnikis?" Ig awna inakni hene git adahan gihikekten. Ig kuwis hiyak ku pariye ig keh. Igme Filip kaytwa giwn: "Amawka wixwiy sarayh ka aynsima karukri mpiy pimavut madikawku madikwa (200) karukri. Metakwa nikwe igkis muwawwite ax aritnanyumni ariwntak." Igme pahavwi gaytakis gikannuhniwi kewye Andre, ku pariye Simawh Pedru gisamwi, ig timapni hene, ig awna git Kiyavwiye Jesus: "Ay pahavwi bakimni ay in. Ig kadahan pohowku akebi bugut kehka akak fahin kewye 'sevada'. Hawata ig kadahan piyana akebi im nopsanyovwi masaraku. Heneme in ka ariknawnema gitkis awaku ka aynsima hiyeg."

Igme Kiyavwiye Jesus awna gitkis: "Wani neras hiyeg batahkiswa." Ayge bareweye amatap adahan igkis batne atere. Igkis hiyeg hiyapni hene, igkis batahkiswebdi atere. Igkis ka aynsima hiyeg. Awaykemnen pukuhka kaba danuh pohowku mil gikebikis (5.000). Ayteke nikwe ig Kiyavwiye Jesus iwe ini bakimni gibuguta. Ig kabayha Kiyavwiye Uhokri adahan ini bugut. Ayteke ig ibekhepni givuwiwkis gikannuhniwi. Igkisme ibekhepni givuwiwkis neras batebdebdihpiye. Ku samah ig keh akak bugut ig keh hawata akak im. Ig ibakhasepni. Igkisme hiyeg kidis ku samah gimawkankis niwntak. Igkis ax kabihibrdave. Ig Kiyavwiye Jesus hiyapni hene, ig awna gitkis: "Ahiwvinay gimanakis asemne adahan yuma aynesnima biyukne."

Igkisme ahiwavepni. Igkis kivunse ka aynsima panye, madikawku akebi akak pisaya arawna (12) akak ini pohowkunene bugut asemne. Neras hiyeg hiyapni hene ku Kiyavwiye Jesus kehe ini annut giwtrikkis, igkis awna: "Oo! Ner igyewa Uhokri gawneve ku kamin amekene Moís kinetihwa minikwak, ku ig aytanek amadgat inin." (Joawh 6.5-14)



Aygete kuwis, gikannunniwi munuke tanan akigrimnat manakwa. Igkis awna: "Kuwis aygete. Uyay diyuhe pahabakat avitit paytwempu Kafarnawh." "Uyay."

Ayge igkis katapte amadgat gihmunkis. Misanpi gawkis, ig Kiyawwiye Jesus kote danuhte gitkis. Igkis hiyapni hene, igkis awna: "Ka sam." Igkis tivik.


Pahaye adahan mayg kamayghew. In kannikase paraw. Igkis puwehnene ativut bobo piyawakad adahan pimavut madikawku madikwa (200) iwantu aviyukan.

Pahaye adahan igkis hiyap Kiyawwiye Jesus waywe ahakwew un. Igkis ka hiyakgi ku pariyene ig. Ig aytweni kenesa arimkat gihmunkis. Igkis hiyapni hene, igkis avisasewbet gibohri. Igme awna gitkis: "Nahnewa ay. Ka yi muwaka avis." Igkis timapni inakni giwn hene, igkis batek ka aynsima. Igkis amavig amadgat gihmunkis. Aynewa igkis danuh atere ku kit gimawkankis. (Joawh 6.16-21)



Ayteké hiyeg danuh atere git Kiyavwiye Jesus. Igkis waxwe gikamkaykis ta git adahan ig sarayh giwak givititkis adahan ig kiyene Kiyavwiye Uhokri gidahankis. Igkisme gikannuhnivwi hiyapni hene, igkis awna gitkis adahan igkis ka ayta sigimwihgi. Igme Kiyavwiye Jesus hiyapni hene, ig ka batek. Ig himehe gikannuhnivwi ayge. Ig awna gitkis: "Isaksanabay bakimnayh igkiste aytnite numkanit. Ka yi muwaka mpitha bakimnayh. Mmanawa ku pariye hiyeg gihiyekemnikis kene bakimnibe ignesnewa ku pariye kawih Uhokri gikumadukan. Ku pahavwi ka iha Uhokri gikumadukan kema bakimnima, igi ka kawih Uhokri gikumadukan. Ihanabay inakni nuwnuh. Henewatbaki in." Ayteké nikwe ig ahiwave bakimnayh, ig ugiswigkis. Ig sarayh giwak givititkis. Ig kiye Kiyavwiye Uhokri gidahankis.


(Markus 10.13-16)



Kiyawwiye Jesus awna: “Nah avuriw nuhiyegavu kabayantiwa kewa pahavwi muwtoh akivarabe kibeyne. Ig muwtoh akivara ku pariye kibeyne ig ahiegbet adahan umahkiswa adahan gamnihtenkis givigvu.” (Joawh 10.11)

“Ku pariye hiyeg igyewa nudahan ignes hiyak nukuvimna. Nahme hiyaknigkis. Igkisme batek wew nukakuh. Nah keh igkis aymuhwanek gimun Uhokri adahan avanenekwa. Igkis ka biyuki giw Uhokri. Yuma pahavwinema hiyeg hiya giwiwhkakis ayteke nuwakutak.”

(Joawh 10.27-28)



Ayteke nikwe ariwnteke ini neras muwveg kiyathakare igkis kehe givahdukawnikis gikakkis neras farizewkis adahan igkis ahegbetenes ginetnikis. Igkis awna: "Mmah wixwiy keh? Ner awayg keh ka aynsima annut. Ku wixwiy ka mpithig, madikte hiyeg kamaxwa givititnek waditnevyenen. Igkis kehginek ig humaw gikivarakis. Ayge nikwe neras ukivarawiy romayenevwi igkis ikiynek ku ig uwiwhpitniwyi giwakutakis. Nawenetke gisuwttatavukis ayta patiptakevwi. Nawenetke igkis xuwehe uwakutakwiy ini uwetriwyi ku kiney wixwiy kiyathene Kiyavwiye Uhokri. Nawenetke igkis xuwehe uhiyegavuwyi judeyenevwi uwakutakwiy."

Ayteke pahavwi awayg gaytakis ig ikene gihiyekemnikis atere. Giw Kayfas. Ignewa muwvegviyene gikivarakis adahan ini peheknene kamukri. Ig awna gitkis: "Yis ka hiyak ariknawnema. Yis ka hiyak ku pariye kabaye adahan wixwiy keh. Nah akkite yit ku pariye watekbeta uhawkanwiynek. Pugamawka ig Jesus umehpika. Kabaye pahavwiwa awayg miya gidahankis madikte hiyeg mpinekata madikte hiyeg miyrap." Kawki gikehbetanma inakni iwit. Igwa Kiyavwiye Uhokri iki git inakni iwit. Ku samah ig muwvegviyene gikivarakis, nikwe ig humaw Uhokri gawneve adahan ekkene ku samah Kiyavwiye Jesus umahkiswa gidahankis madikte hiyeg judeyenevwi. Ka gidahankiswonema judeyenevwi, heneme ig umahkiswa adahan madikte Uhokri gikamkayuvwi muwapuneyve adahan igkis humaw pahavwiwa pawtak. Ariwntak ini hawkri neras judeyenevwi giwewkistenkis igkis ahegbetevye ginetnikis adahan giwmasepten Kiyavwiye Jesus.


(Joawh 11.47-53)



Igme Kiyawwiye Jesus batahkiswe aranwa axtet gikakkis giwatnivwi madikawkunene gikebikis gikakkis piyananene gawnakis (12). Ayge abetnewa axka, ig Kiyawwiye Jesus awna gitkis: "Pahavvi yagtaknek ay igi kamaykiswennek ta gitkis nuvetunyavu. Ihanabay inakni nuwnuh. Henewatbaki in." Igkisme giwatnivwi timapni hene, igkis wakaymnibdi ka aynsima. Igkis awnebdi pahavwimpi: "Kiyawwiye, ku ka nahma kamaykiswepnek?" Igme Kiyawwiye Jesus kaytwa giwnkis: "Ner ku pariye mehbetene bugut nukakuh amadga paheknene miruk ignebaki nukamaykiswitninek."


(Matews 26.20-23)

Igi ner Judas Iskariyotis. Ig hiyapni hene ig tivik pisenwate ta gitkis neras muwvegviyene, ig ekke gitkis ku kiney Jesus. Igkisme atak atere, igkis kamaxwig. Ayteke nikwe igkis umahkiswig.




Ayge piyana gikebikis awaykemni kakehniye, igkis waxwepka payak gikak Kiyavwiye Jesus adahan igkis umahavepka payak gikak. Ayteke igkis danuh ta avitit paha waxri imuhrivtnene kewye "Waxri Hiyeg Gaptiwitwiye". Ayge igkis deddehe Kiyavwiye Jesus ta aminat giyakni. Ayteke igkis deddehe neras piyananene kakehniyevvi aminat giyaknikiswa hawata. Pisenwa igkis tabirase giyaknikis ayge gihumwa Kiyavwiye Jesus, pahawwi tabirasaka kihehaptak, pahawwime patuwanaptak. (Luwkas 23.32-33)

Pahawwi gaytakkis neras kakehniyevvi ku pariye daddahka ayge ig hawata ig mahivwihipig. Ig awna git: "Mmah pis ka Uhokri gikanyanma adahan ukumaduketni? Asa amnih pivot nikwe marihwa pis amnih usuh hawata." Igme ner kakehniye pahawwiwa akiw ig timapni ner awayg giwn hene, ig himehpig. Ig awna git: "Mmahki pis awna inakni hene? Mmah pis ka avis gibohri Uhokri? Wis ikaksaka adahan miyaka hawata ke igbe. Wis kis adahan miyarap adahan katiwnihpiye utaraksan. Igme ner yuma mbaynema gikehni." Ayteke ig awna ta git Kiyavwiye Jesus. Giwn: "Kiyavwiye Jesus, kiyenanuhba aysawnemenek ku aysaw pis aytu kumaduka." Igme kaytwa giwn: "Ku avim inin pis misakwa numunuh abet kabayka aynte giwetrikis hiyeg kibeynevvi miyaravye. Ihanaba inakni nuwnuh. Henewatbaki in." (Luwkas 23:39-43)




Ayeteke puwipka danuh. Pahaye adahan kamuw abutni ka kabutni akiw. Hawkri misanpi muwapuw he daraka kamuw in kavusa kabutni akiw. Nikwenewa avim ini, ini kamis amaptenten Uhokri giwskeki pi kiyatenene ku pariye ariku Uhokri Givin in sigke pabakak. In woke ahin ta arikut ini Uhokri giwskeki. Nikwenewa ig Kiyavwiye Jesus kabiman akak gihawna. Ig awna: "Pa, nah iki nanmavuh ta piwakurit kuri." Pisenwa gawnan inakni, giyakek madike. Ig miyap. Ayeteke pahavwi romayene suwtat gikivarakis ig hiyapni madikte ku pariye danuh avim ini, ig kabayha Uhokri. Ig awna: "Inyewa ner awayg kibeyne hiyeg, ig."

(Luwkas 23.44-47)





Ayete pahavwi awayg igisyé danuh atere. Ig ariwntak paytwempu Arimateya. Giw José. Ig hawata Kiyawwiye Jesus gikannuhni. Ig hiyapni hene ku samah ayipa Jesus gimiremni, ig tivik ta gimkat Pilatus, ig awna git: "Kiyawwiye, uya amnihun isaksan adahan nah atak iwe Jesus givit." Igme Pilatus timapni hene, ig awna ta gitkis gisuwtatavu: "Wani ikepka git kiyawwiye José." "Ihi."

Igme José hiyapni hene, ig tivik. Ig danuh atere, ig wiwhe givit aminatak giyakni. Ayteke ig awasminevgi akak pahak dagam seyne barewbetye. Pisenwa ig sarayhpig ta arikut pahayku imewti nukune ku pariye ayipa ig atikis gidahanwa ariku tip amiyokni. Ayteke ig wagesmine pohow tip kiyapyad adahan asabwatip gimew. Pisenwa ig tivik. Avim ini kiyavuno Mahi Madalena gukak nor pahavuwa Mahi akiw, egkis batabdawak ayge avitkig gimew. (Matews 27.57-61)



Ayeteke paka abet bekawkenen egkis tinogben tivikwiyo ta arimkanit Kiyavwiye Jesus gimew. Egkis iwe ini imihgi ku pariye gahegbetankis. Egkis tivik. Egkis danuh atere, egkis ute gimew asabwat ayipa wokepka. Egkis hiyapni hene, egkis pareke aterenewa arikut gimew. Heneme egkis ka uti Kiyavwiye Jesus givit ayge. Egkis hiyapni hene, egkis wakaymnibdi ka aynsima. Egkis awna: "Kitwiki givit?"

Pahaye adahan egkis hiyap piyana awaykemni tabirwak ayge gumunkis. Igkis kasimsavu akak simis tigigihwene. Egkis hiyapni hene, egkis avisasew, egkis paberetusaw mabuw ta gikimpuritkis. Ayteke nikwe neras awaykemni awna gutkis: "Kiyavwiye Jesus iveg ig. Mmahki yis givegvetni ay ariku miyaviye giwetri? Ig yuma ay. Ig kuwis kannikew. Kiyeminahnay giwn ku samah ig awna yit kuhwekwa ku samah ig aynete avit Galileyamnaw. Avim ini ig awna yit ku ig kamaykiswikanek ta gitkis hiyeg ku pariye mbeyevyen en gihiyekemnikis. Ig awna ku ig daddahkiswikanek, heneme bet amamnampiye hawkri ariwntak gimiremni ig kannikawnek akiw." Egkis timapni hene, egkis kiye inakni giwn. (Luwkas 24.1-8)



Ayeteke nikwe igkis kannikew igkis diyuhe tivik ta avitit paytwempu Jerusalém akiw. Igkis danuh atere, igkis ute giwatnivwi madikaw-kunene gikebikis gikak pahavwi gawna (11), ignes pahadguvunas gikakkis gikannuhnivwi nawenyevwi. Ku samah igkis danuhantena atere, igneskit awna gitkis: "Kiyavwiye Jesus kuwis hiapkiswe git Simawh Pedru! Inyewatbaki ig kuwis kannikew!"

Neras piyananene gikebikis timapni hene, igkis ekke gitkis ku pariye kuhwekwa danuh gitkis ahinavrik. Igkis ekke ku samah igkis hiyekvgi amun ku samah ig sigkebdihne bugut gidahankis. Ku samah igkis awnempiye inakni iwit, igwa Kiyavwiye Jesus hiapkiswe tabir ayge gibetkis. Ig awna gitkis: "Uhokri gabay yikaknek!" Igkisme wadisasew mpiynevevye hawata igkis misekwe akak aviska. Gitkis igkis hiye pahavwi anmapti. Ig hiyapni hene, ig awna gitkis: "Mmahki yis ka aynsima wadisasew? Mmahki yis matekbeta yihiyekemni? Iveznay nuwakurit akak nukugkavrikut adahan yis hiyak ku nahnewa ay in. Daxtanuy. Ayge nikwe yis ihpin. Mmanawa anmapti yuma gih yuma gavita kema nahma." Ig awna inakni, ig ekke giwak gitkis akak gikugku adahan igkis hiap pudubdu adukwen.

(Luwkas 24.33-40)



Ig Kiyawwiye Jesus awna gitkis: "Uhokri gannasan awna ku amawka nah hiyap mbeyne ka aynsima, amawka nah umehpika, heneme abet amamnampiye hawkri ariwntak numiremni nah kannikaw akiw. Hawata akiw in awna ku amawka inetit adahan nuwnuh in ibakaw muwapuw ta gitkis madikte hiyegviyenevwi amadga wayk. In kinetihwaka ta gitkis adahan ignes wages gihiyekemnikis marihwa Uhokri bayahminigkis ariw gitaraksankis. Yisnewa ku pariye inetitkekne nudahan adahan ekkene inakni nuwnuh ta gitkis. Pitatye yis kavusa akkin ay Jerusalém. Hawkavanek nah kawihkis nutivuh yivititnek ku pariye Wigwiy gikaksan yit. Misakwanabay ay avit inin paytwempu Jerusalém he ku aysaw Uhokri gannu kawihkiska yivititnek."

Ayteké pisenwa inakni gawnan, igkis pese. Ig Kiyawwiye Jesus waxwevgikis kennesa arimkanit paytwempu Betaniya. Ayge ig awokasew gimkanitkis. Ig sarayh kabayka givititkis. Henewa ig tivik giwkis, ig iwepka ta inurikut. (Luwkas 24.46-51)

Mmanawa Kiyavwiye Uhokri batek gikakkis madikte hiyeg mpinevevye. Inneki keh ig ike nernewa gikamkayh adahan ku pariye hiyeg kamaxwevye givitit, ig ka biyuk giw Kiyavwiye Uhokri, heneme ig aymuhwa gimun Kiyavwiye Uhokri adahan avanenekwa. Ig Kiyavwiye Uhokri awahkis gikamkayh atan kawki adahan gisayreptenkisma hiyeg, heneme adahan gamnihtenkis. Nikwe ku pariye hiyeg kamaxwenevvi givitit gikamkayh, igkis ka sarayhpiknema hanpa arimkanit biyukwaki. Igkisme ku pariye kane kamaxwa givitit gikamkayh, igkis kuwis ikaksaka adahanikwa biyukwaki mmanawa igkis ka kamaxwa givitit nernewa gikamkayh Kiyavwiye Uhokri. (Joawh 3.16-18)

Ku wis awna: “Nah yuma nuvathawni”, amun ini wis kinisne uvitwa. Wis ka hiyak ku pariye inyewatnene ay avit uyakni. Igme Kiyavwiye Uhokri ig waditye. Ig kis adahan wis kamaxwa givitit. Ku wis akkamnih utaraksan git, wis hiyakni ku ig bayahminaw ariw ini utaraksan, wis hiyakni ku ig barewvithaw ariw madikte uvathawni. (1 Joawh 1.8-9)

Ig Kiyavwiye Jesus awna: “Nahnewa ahin keh yis danuh git Uhokri. Nahnewa hiyakkis Uhokri gihiyekemni inyewatnene yit. Nahnewa keh yis aymuhwa gimun Uhokri adahan avanenekwa. Wake ka nahma, yumahkam hiyeg danuhne git Wigwi. Nahnewa ku pariye ahin atere git. Yuma nawenyewa ahin akiw.” (Joawh 14.6)


Ayteke ig awna akiw:

“Aytninabay numkanit, yis ku pariye yuma kit, yis mpiksewnevvi ke pahavwibe hiyuhwene awika mpiy gidatni. Ba yi ayta mayuwasa yihihwan nutuh. Nah keh yis mayak ta nuvitit. Wewnabay pahemteke nukakuh kewa piyana pakbe dahaka gibitamnakis akak pahat ah adahan kakhiska awika gitkis. Kannuhwanabay nutuh. Mmanawa nah kibeyne hiyeg, nah tuwatasewne hiyeg, nah ikaw warikapte giwkis madikte hiyeg. Ku yis kannuhwa hene nutuh, nikwe yis uti mayaka abet yihiyekemninek. Ku pahawi wew pahemteke nukakuh, igi ka mpiksaw mpinevevyema akiw. Hagehege gihiyan.”

(Matews 11.28-30)

Ig Kiyavwiye Jesus keh ka aynsima annut akiw ay giwtrikis gikannuhnivvi. Nah ka akkin madiktema amadgatak inin karta. Heneme nah anniri inakni iwit ku pariye nanhan ay kahadbe yis iha ku ig Kiyavwiye Jesus ignewa Cristo, ig Uhokri gikanyan adahan ukumaduketniwy. Kahadbe yis iha ku ignewa Kiyavwiye Uhokri gikamkayh. Ku yis kamaxwa givitit, yis aymuhwanek gimun Kiyavwiye Uhokri adahan avanenekwa. (Joawh 20.30-31)

“Nahnewa akavuska. Nahwata amaksemni. Yuma pahawwinema navitkignema. Yumahwata ewka nuwenuh akiw. Nahnewa pitatye. Nahwata butte.”
Henewatbaki ig Kiyavwiye Jesus awna. (Apokalipsi 22.13)



Ig Kiyavwiye Jesus ig avanenekwa ay. Ba pis muwaka kamaxwa givitit adahan pis darihwekne gikak? Ku hene pimawkan, hiyawa pis awna git. Awna han:

"Kibeyne, Kiyavwiye Jesus, pisnewa katiwihi adahan madikte nutaraksan, mmanawa pis umahkiswe nudukwenavrik, pis sukase pimig nudahan, pis ikaw git pig pahavwite adahan pis kehne gibetki. Nahme nikwe nah ikaw ta pit pahavwite, nah iki nuyakni ta pivitit. Uya kawihkis pitip nuvitit adahan nah humaw pikamkayh. Hawata adahan pis huwithene nuhiyakemni, adahan pis barewwithan ariw nuvathawni."

Tamak piw ay adahan arekhetni ku pis awna inakni avititak piyakni.

Ilustrado por Linda Riddell

Texto proveniente de: *Uhokri Gahegbetawni Nukune*
O Novo Testamento e Salmos na Língua Palikur
© 2018 Wycliffe BibleTranslators, Inc.

www.goodnewscoloringbook.org

Palikur

